

Na osnovu člana 13. tačka 5. Statuta, Skupština Bosanskohercegovačkog omladinskog saveza u Švedskoj, na sjednici održanoj 21. aprila 2007. godine, donijela je

STATUT

BOSANSKOHERCEGOVAČKOG OMLADINSKOG SAVEZA U ŠVEDSKOJ

I - OPŠTE ODREDBE

ČLAN 1.

Statutom se propisuje unutrašnja organizacija i djelokrug rada Bosanskohercegovačkog omladinskog saveza u Švedskoj (u daljem tekstu: BHUF).

ČLAN 2.

- (1) BHUF je demokratska, višenacionalna i apolitična organizacija koja na dobrovoljnoj osnovi u svoje članstvo okuplja BH omladinska udruženja koja djeluju u Švedskoj.
- (2) BHUF djeluje u skladu sa zakonima Švedske i odredbama ovog Statuta.
- (3) Sjedište BHUF-a određuje Glavni odbor prema ukazanim potrebama.
- (4) BHUF ima svoj pečat i memorandum čiji izgled i sadržaj utvrđuje Glavni odbor.
- (5) Službeni jezici BHUF-a su jezici naroda i narodnosti Bosne i Hercegovine i Švedske.

II - OSNOVNA DJELATNOST BHUF-a

ČLAN 3.

- (1) BHUF koordinira rad lokalnih omladinskih udruženja i pomaže njihove aktivnosti na njegovanju i unapređivanju maternjeg jezika, kulture, tradicije, obrazovanja i informisanja, kao i uključivanja u društveni život Švedske i ostvarivanja ravnopravnosti sa većinskim stanovništvom u Švedskoj.
- (2) BHUF se bori protiv svih vrsta negativnosti u društvu: rasizma, droge, alkoholizma, diskriminacije, nepravde i dr.
- (3) BHUF se zalaže za ravnopravnost i jednakost svog članstva na svim nivoima bez obzira na nacionalnu, starosnu, polnu i socijalnu strukturu.
- (4) BHUF saraduje sa drugim organizacijama i institucijama, prvenstveno sa BH predznakom, kao što su Savez Bosansko-Hercegovačkih udruženja u Švedskoj i Bosansko-Švedski Savez žena, a vidovi saradnje utvrđuju se sa međusobnim dogovorom.
- (5) BHUF predstavlja svoje članove kod državnih organa i institucija u Švedskoj i Bosni i Hercegovini i saraduje sa sličnim organizacijama u Švedskoj i izvan nje.

III - ORGANI UPRAVLJANJA

ČLAN 4.

- (1) Najviši organ upravljanja i odlučivanja BHUF-a je Skupština.
- (2) Glavni odbor je izvršni organ BHUF-a.
- (3) Nadzorni organ je Reviziona komisija.

IV - SKUPŠTINA BHUF-a

ČLAN 5.

- (1) Delegati Skupštine mogu biti članovi Glavnog odbora lokalnog omladinskog udruženja, tj. predsjednici istih. Pored predsjednika, lokalno omladinsko udruženje može delegirati po jednog delegata na svakih sto (100) članova udruženja. Prema ovom principu, lokalno omladinsko udruženje do 50 članova bi predstavljao samo predsjednik, udruženje od 51 do 100 članova na Skupštini BHUF-a bi predstavljali predsjednik i jedan delegat (1+1), udruženje od 101 do 200 članova na Skupštini BHUF-a bi predstavljali predsjednik i još dva delegata (1+2), udruženje od 201 do 300 članova bi predstavljali predsjednik i još tri delegata (1+3), što bi ujedno bio i maksimalan broj delegata koje jedno lokalno omladinsko udruženje može delegirati. U slučaju da predsjednik lokalnog omladinskog udruženja bude spriječen, delegat može biti bilo koji drugi član Glavnog odbora lokalnog omladinskog udruženja.
- (2) Prilikom izbora delegata, lokalna omladinska udruženja moraju voditi računa o principu Statutom utvrđene starosne zastupljenosti delegata, koja mora biti srazmjerna odnosu od 60% onih čija je starosna dob između 7-25 godina, odnosno do 40% delegata čija starosna dob može biti van gore navedene starosne granice.

V - PRAVA I OBAVEZE SKUPŠTINE

ČLAN 6.

- (1) Skupština na svojim sjednicama:
 - donosi Poslovnik o svom radu,
 - donosi Statut i izmjene i dopune Statuta,
 - razmatra Izvještaj o radu BHUF-a, Finansijski izvještaj i Izvještaj nadzornog organa – Revizione komisije,
 - bira Glavni odbor, predsjednika Glavnog odbora i jednog člana nadzornog organa – Revizione komisije i Izbornu komisiju,
 - donosi Program rada, Finansijski plan i odluku o visini članarine.

- (2) Skupština razmatra i odlučuje i o drugim pitanjima iz svoje nadležnosti propisane Statutom i drugim aktima BHUF-a.

VI - ZASJEDANJE SKUPŠTINE

ČLAN 7.

- (1) Redovna Skupština zasjeda u prvom kvartalu svake godine.
- (2) Mjesto i datum održavanja Skupštine određuje Glavni odbor.
- (3) Redovnu Skupštinu zakazuje Glavni odbor, a vanredna Skupština može biti zakazana po odluci Glavnog odbora i inicirana od strane Nadzornog organa ili najmanje jedne polovine lokalnih omladinskih udruženja – članica BHUF-a.
- (4) Poziv sa dnevnim redom za Skupštinu se šalje u sva lokalna omladinska udruženja najkasnije mjesec dana prije održavanja Skupštine, a radni materijali se šalju delegatima Skupštine i svim lokalnim omladinskim udruženima najkasnije 15 dana prije održavanja Skupštine.
- (5) Dnevni red zasjedanja Skupštine predlaže Glavni odbor BHUF-a, a može ga predložiti i lokalna omladinska udruženja, članice BHUF-a.
- (6) Svi prijedlozi dnevnog reda od naprijed navedenih subjekata moraju biti dostavljeni u pismenoj formi na adresu BHUF-a, najkasnije do 31. decembra tekuće godine, da bi bili razmatrani na sjednici Glavnog odbora prije utvrđivanja prijedloga dnevnog reda za zasjedanje Skupštine.

ČLAN 8.

- (1) Skupština zasjeda i odlučuje ako je prisutna najmanje jedna trećina od ukupnog broja delegata.
- (2) U slučaju nedostatka kvoruma delegati odlučuju da li će se Skupština održati ili će zakazati novu Skupštinu u roku od 60 dana.

- (3) Na Skupštini glasanje se vrši po principu jedan delegat - jedan glas.
- (4) Članovi Glavnog odbora i Nadzornog organa BHUF-a nemaju pravo glasa prilikom glasanja o oslobađanja od odgovornosti za rad u protekloj godini.
- (5) Profesionalno angažirana lica u BHUF-u i predsjednici odbora i komisija na saveznom nivou imaju pravo prisustva i učestvovanja u radu bez prava odlučivanja, ukoliko nisu članovi Glavnog odbora ili delegati lokalnih omladinskih udruženja.
- (6) Na zasjedanju Skupštine glasanje je javno ukoliko Skupština ne odluči drugačije. Kod jednakog broja glasova, usvaja se ona odluka za koju je glasao predsjednik BHUF-a.
- (7) Sve odluke, izuzev Statuta i Izmjena i dopuna Statuta donose se običnom većinom glasova (50% + 1) od prisutnih delegata. Statut, kao i Izmjene i dopune Statuta donose se dvotrećinskom većinom glasova prisutnih delegata.

ČLAN 9.

Na redovnom zasjedanju godišnje Skupštine Dnevni red sadrži:

1. Izbor radnog predsjedništva, zapisničara i dva ovjerivača zapisnika,
2. Izbor tri člana Verifikacione komisije,
3. Izbor tri člana Izborne komisije,
4. Podnošenje izvještaja Verifikacione komisije o prisutnosti delegata i utvrđivanje kvoruma,
5. Razmatranje Izvještaja o radu BHUF-a,
6. Razmatranje Finansijskog izvještaja,
7. Razmatranje Izvještaja nadzornog organa – Revizione komisije,
8. Donošenje odluke o oslobađanju odgovornosti Glavnog odbora za rad u prethodnoj godini,
9. Razmatranje prijedloga lokalnih omladinskih udruženja,
10. Donošenja Programa rada za narednu godinu,
11. Donošenje Finansijskog plana za narednu godinu,
12. Donošenje odluke o visini članarine,
13. Izbor Glavnog odbora i jednog člana nadzornog organ-Revizione komisije i
14. Ostala pitanja.

VERIFIKACIONA KOMISIJA

ČLAN 10.

- (1) Verifikaciona komisija se sastoji od predsjednika i dva člana.
- (2) Verifikaciona komisija na zasjedanju Skupštine utvrđuje broj prisutnih delegata, utvrđuje kvorum i podnosi izvještaj Skupštini.

IZBORNA KOMISIJA

ČLAN 11.

- (1) Izborna komisija sastoji se od predsjednika i dva člana.
- (2) Izborna komisija obavlja tehničke poslove oko izbora i po završenom glasanju utvrđuje rezultate glasanja i podnosi izvještaj Skupštini.

VII - GLAVNI ODBOR

ČLAN 12.

- (1) Skupština u Glavni odbor bira sedam redovnih članova i dva zamjenika člana Glavnog odbora.
- (2) Za članove Glavnog odbora i nadzornog organa – Revizione komisije BHUF-a predloženi kandidati trebaju biti mlađi od 25 godina.
- (3) Od ovog pravila mogu biti izuzeti samo oni članovi gore navedenih organa koji su nakon isteka svog prvog mandata prešli starosnu dob od 25 godina, ali samo u slučaju da njihovim ponovnim izborom ne bi došlo do narušavanja principa Statutom utvrđene starosne zastupljenosti članova ovih organa po kojem najmanje 60% članova mora biti starosti od 7-25 godina, dok preostali dio članova može biti izvan ove starosne dobi (ali

maksimalno do 40%), a u koji je već uračunat i eventualni kandidat koji se bira, a stariji je od 25 godina.

- (4) Mandat članova Glavnog odbora traje dvije godine, a Nadzornog organa jednu godinu.
- (5) Članovima Glavnog odbora, kao i članu Nadzornog organa koji se bira iz reda BHUF-a, po isteku mandata isti se može obnoviti samo još jedan put. Član Glavnog odbora koji je u toku trajanja svog mandata izabran na funkciju predsjednika Glavnog odbora, funkcija predsjednika mu se po isteku mandata može obnoviti još jedanput (dva puta uzastopno).
- (6) Kandidate za gore navedene organe mogu predlagati Glavni odbor i lokalna omladinska udruženja, članice BHUF-a.
- (7) Svi prijedlozi prethodno moraju biti razmatrani na sjednicama naprijed navedenih subjekata i u pismenoj formi dostavljeni na adresu BHUF-a najkasnije do 31. decembra tekuće godine, da bi bili razmatrani na narednom zasjedanju Skupštine.

KONSTITUISANJE GLAVNOG ODBORA

ČLAN 13.

- (1) Glavni odbor, na prvoj konstituirajućoj sjednici izuzev predsjednika kojeg je izabrala Skupština, bira podpredsjednika i imenuje sekretara i blagajnika, i određuje lica zadužena za rad po stručnim resorima i odborima.
- (2) U slučaju privremene ili trajne spriječenosti u obavljanju funkcije predsjednika, sva prava i obaveze preuzima podpredsjednik.
- (3) U slučaju da nosioci drugih funkcija budu privremeno ili trajno spriječeni da obavljaju svoju funkciju zamjenjuju ih dva zamjenika članova Glavnog odbora.
- (4) U slučaju spriječenosti ili prestanka članstva u Glavnom odbor, ovlaštava se Glavni odbor da na upražnjena mjesta može kooptirati nove članove čiji mandati će trajati do naredne redovne Skupštine.

PRAVA I DUŽNOSTI GLAVNOG ODBORA

ČLAN 14.

- (1) Glavni odbor BHUF-a priprema Program rada, godišnje i druge izvještaje, prijedloge odluka i drugih akata koje razmatra i usvaja Skupština.
- (2) Glavni odbor izvršava programom utvrđene poslove i zadatke i druge odluke i akta koje je donijela Skupština.
- (3) Glavni odbor donosi Poslovnik o svom radu i Pravilnik o radu nadzornog organa - Revizione komisije.
- (4) Glavni odbor izvršava i druge poslove i zadatke propisane odredbama ovog Statuta.
- (5) Poslovnikom o radu Glavnog odbora utvrđuju se pobliže poslovi i zadaci, sazivanje i održavanje sjednica i drugi poslovi iz nadležnosti Glavnog odbora.
- (6) Glavni odbor po određenim pitanjima imenuje zastupnike i potpisnike ispred BHUF-a.
- (7) Izvještaj o radu i Finansijski izvještaj BHUF-a obuhvata period od 1. januara do 31. decembra.
- (8) Finansijski izvještaj dostavlja se Nadzornom organu na kontrolu, koji je dužan izvršiti pregled u roku od sedam dana i svoj izvještaj dostaviti Glavnom odboru.
- (9) Izvještaj o radu, Plan rada, Finansijski plan i Finansijski izvještaj zajedno sa Izvještajem Nadzornog organa dostavljaju se lokalnim omladinskim udruženjima na razmatranje, a najkasnije u roku od 15 dana prije održavanja Skupštine.

ODGOVORNOST GLAVNOG ODBORA

ČLAN 15.

- (1) Članovi Glavnog odbora su zajednički odgovorni za sve svoje donesene odluke.

- (2) Član Glavnog odbora koji se je uzdržao u procesu odlučivanja nije odgovoran za tu odluku.
- (3) Ako se utvrdi da član Glavnog odbora iz neopravdanih razloga ne izvršava poslove utvrđene Statutom, Poslovníkom o radu Glavnog odbora i ne izvršava donijete odluke, Glavni odbor će opomenuti, a u ponovljenom slučaju može donijeti odluku o isključenju iz Glavnog odbora.

NADZORNI ORGAN (REVIZIONA KOMISIJA)

ČLAN 16.

- (1) Nadzorni organ je interni kontrolni organ BHUF-a koji čine tri člana. Jednog člana Nadzornog organa imenuje Skupština BHUF-a, dok je imenovanje preostala dva u nadležnosti Skupštine Saveza BH udruženja u Švedskoj (1 član) i Bosansko-Švedskog saveza žena (1 član).
- (2) Nadzorni organ čine predsjednik i dva člana. Članovi Nadzornog organa moraju biti članovi udruženja i poželjno je da budu po zanimanju ekonomisti ili da imaju iskustva o materijalno-finansijskom poslovanju i da dobro poznaju švedski jezik.
- (3) Član kojeg imenuje Skupština BHUF-a, zbog neophodnosti poznavanja i stručnosti iz oblasti ekonomije ne mora biti unutar starosne granice propisane Statutom.
- (4) Sva finansijska dokumentacija i druga akta moraju stalno biti dostupni Nadzornom organu.
- (5) Rad Nadzornog organa regulira se posebnim Pravilnikom o radu Nadzornog organa kojeg usvaja Glavni odbor.
- (6) Ukoliko se ukaže potreba Glavni odbor može angažovati revizora za finansijske poslove.

SEKRETARIJAT

ČLAN 17.

- (1) Sekretarijat sačinjavaju angažovana lica na izvršavanju tehničkih poslova i zadataka u BHUF-u.
- (2) Radom Sekretarijata rukovodi sekretar BHUF-a.
- (3) Rad Sekretarijata utvrđuje se Pravilnikom o radu Sekretarijata koji donosi Glavni odbor.

PRIHODI BHUF-A

ČLAN 18.

- (1) Izvori prihoda BHUF-a su članarina, organizacijska pomoć i dotacije za različite aktivnosti, različiti vidovi samofinansiranja i dobrovoljni prilozi, ako to nije u suprotnosti sa Statutom BHUF-a.
- (2) Ovlašteni potpisnici materijalno-finansijskih dokumenata su predsjednik, blagajnik i lica koje imenuje Glavni odbor.

VIII - ČLANSTVO BHUF-a

ČLAN 19.

- (1) Član BHUF-a može biti svako pri Sekretarijatu uredno registrovano udruženje, odnosno svako omladinsko udruženje koje okuplja članove starosne dobi od 7-25 godina u najmanjem omjeru od 60% od ukupnog broja članova, odnosno čiji upravni odbor sačinjavaju mladi starosne dobi od 7-25 godina u najmanjem omjeru od 60%, koja u potpunosti prihvata Statut BHUF-a i čiji rad i djelovanje nisu u suprotnosti sa istim kao i ostalim normativno-pravnim aktima Organizacije.
- (2) BHUF može imati počasne članove.

- (3) BHUF može imati i svoje potpomažuće članove, odnosno one članove koji u finansijskom i materijalnom smislu žele da potpomognu rad BHUF-a.

PRIJEM U ČLANSTVO

ČLAN 20.

- (1) Odluku o prijemu lokalnog omladinskog udruženja u članstvo BHUF-a donosi Glavni odbor BHUF-a na osnovu podnijetog zahtjeva za prijem u članstvo koji mora da sadrži propisane dokumente: dokaz o registrovanju udruženja, izvještaj o radu, spisak članstva i dr.
- (2) Lokalno omladinsko udruženje potrebno je da ispuni i sljedeće kriterije:
- Da je formirano u skladu sa kodeksima osnovnih demokratskih načela,
 - Da je ekonomski samostalno, odnosno da svojim sredstvima raspolaže samostalno i
 - Da prihvata Statut i druga normativno-pravna akta BHUF-a.
- (3) U određenim slučajevima, prilikom primanja u članstvo jednog lokalnog omladinskog udruženja u BHUF, Glavni odbor može utvrditi i druge kriterije.

PRAVA I OBAVEZE LOKALNIH OMLADINSKIH UDRUŽENJA ČLANICA BHUF-A

ČLAN 21.

- (1) Svako lokalno omladinsko udruženje ima pravo da bude informisano o radu BHUF-a i da daje prijedloge, primjedbe i sugestije na rad istog.
- (2) Svako lokalno omladinsko udruženje ima pravo da učestvuje u aktivnostima koje organizira BHUF, a ako ima preko 20 članova ima pravo i da bude zastupljena u organima BHUF-a.

- (3) Lokalna omladinska udruženja dužna su da za tekuću godinu uplate članarinu najkasnije do 30. juna i da Sekretarijatu BHUF-a redovno u propisanom roku dostavljaju godišnju dokumentaciju – spisak članova i godišnji izvještaj o radu.
- (4) Lokalna omladinska udruženje dužna su da aktivno djeluju u skladu sa Statutom BHUF-a i učestvuju u radu Skupštine i drugih organa istog.
- (5) Lokalna omladinska udruženja dužna su da izaberu i konstituišu svoje glavne odbore, da donesu statut i podstatutarne akte.

PRESTANAK ČLANSTVA U BHUF-U

ČLAN 22.

Odluku o prestanku članstva u BHUF-u donosi Glavni odbor na osnovu utvrđenih razloga koji mogu biti:

- Ako se u propisanom roku ne izvrši uplata članarine BHUF-u,
- Ako se ne ispune Statutom BHUF-a propisane obaveze omladinskog udruženja o predavanju godišnje dokumentacije u određenom roku.
- Isključenje zbog djelovanja u suprotnosti sa odredbama Statuta BHUF-a,
- Prestankom rada lokalnog omladinskog udruženja
- Po vlastitoj želji, uz pismeni zahtjev sa Skupštine lokalnog omladinskog udruženja.

PONOVNI PRIJEM U ČLANSTVO

ČLAN 23.

Lokalno omladinsko udruženje koje je ranije bilo članica BHUF-a, a kojem je prestalo članstvo na osnovu propisanih razloga u Statutu BHUF-a, može ponovo postati članica na osnovu podnijetog zahtjeva, a po otklanjanju razloga zbog kojih je prestalo članstvo i ispunjavanju i drugih propisanih uvjeta, o čemu odluku donosi Glavni odbor.

IX - JAVNOST RADA

ČLAN 24.

- (1) Rad Skupštine, Glavnog odbora i drugih organa i komisija BHUF-a je javan.
- (2) U štampi i drugim sredstvima informisanja obavještava se javnost o aktivnostima BHUF-a.

X - PRESTANAK RADA BHUF-a

ČLAN 25.

- (1) BHUF će prestati radom kada prestanu razlozi i potrebe za njegovim djelovanjem.
- (2) Odluku o prestanku rada BHUF-a donosi Skupština sa dvotrećinskom većinom glasova svih članova.
- (3) Imovina BHUF-a nakon izmirenih obaveza stavlja se na raspolaganje humanitarnoj organizaciji u Bosni i Hercegovini, o čemu će donijeti odluku Glavni odbor.

XI - ZAVRŠNE ODREDBE

ČLAN 26.

- (1) Statut stupa na snagu danom donošenja.
- (2) Tumačenje ovog Statuta daje Skupština BHUF-a.
- (3) Stupanjem na snagu ovog Statuta, prestaje da važi Statut donijet na Skupštini održanoj 06.04.2002. godine.